

重修古浪縣志

卷七

古浪縣志卷七

兵防志

古浪地居山峽之衝自漢唐元明以來迭爲險要或爲西夏羌番所踞據或爲屯守防戍之營壘山川險峻爲用兵者所必爭清雍正間改所爲縣爲甘省西北咽喉要地故營堡羅列守禦甚嚴然道咸以後綠營甚不足恃同治軍興地方糜爛此後每有變故輒駐防營以資攻守而保甲警察又最不可少者也志兵防第七

營制

清順治二年設大靖營參將一員土門營安遠營守備各一員黑松堡把總一員康熙十年裁黑松堡把總一員改設古浪堡把總一員十一年裁安遠營守備又裁大靖營參將改設守備十九年仍設大靖營參將又復設安遠營守備康熙三十年又設黑松堡把總一員

古浪縣志

卷七

一

涼州城內東大街
河西印刷局承印

後改大靖營參將爲遊擊安遠營守備爲都司光緒二十五年移都司營署於龍溝堡

古浪各營堡兵額之制已屢變矣自雍正間增定兵額共馬步戰守兵六百八十二名官戰營馬二百三十三匹自是以來或裁或增或移此駐彼損益之制因時制宜亦非大有更張也迄同治以後總督左宗棠以國家養兵二百餘年而倉猝時曾不得一兵之用於是疏請裁兵一舉而汰之者通省幾四萬餘人亦兵貴精不貴多之意也至光緒間再汰冗兵所存者不過原額十分之二至民國成立舉官兵而盡裁撤之以鑒於現勢非編練陸海空軍不足爲用也

烽墩

古浪縣城南北沿路烽墩一十四座

西山堡烽墩五座

黑松堡南北沿路烽墩十座

安遠堡南北沿路烽墩八座

土門北邊一道東西沿路烽墩一十八座邊長五十三里九分

土門東西沿路烽墩四座

大靖北邊一道沿邊烽墩一十三座邊長五十二里五分

大靖東西沿路烽墩五處

案烽墩一作烽候考後漢書注古人戍守作高土臺臺上作桔皋

桔皋頭有兒零以薪草置其中常低之有寇即燃火舉之以相告

元樞詩 烽候各崎嶇戎昱詩 山頭烽子聲聲叫知是將軍夜

獵歸可知烽墩之設周秦時已有之矣

碉墩

民國二十四年奉省府令為禦防匪亂起見在縣城左右山崗及東

古浪縣志

卷七

二

涼州城內東大街
河西印刷局承印

西大道要隘處建築

東昇峯頂兩座 在縣東里許

陽峯山頂兩座 在縣西北里許

古龍山頂兩座 在縣南里許

縣城北關外一座

教場坡一座 縣南二里許

關爺廟一座 縣南二十里

龍溝堡一座 縣南四十五里

烏稍嶺一座 縣南七十五里

驛傳

古浪自明時於東西大路設二驛三所清初仍之又添設五塘於東北邊路二驛者古浪驛龍溝驛也五塘者圓墩塘土門塘夾山嶺塘

大靖塘黃家寺塘也同治間戎馬倥傯傳遞緊急驛塘夫馬有增無減自肅清後裁去五塘於大路邊路統設五驛古浪龍溝此大路兩驛也大靖夾山圓墩此邊路三驛也夫馬驛路各有差至民國二年底通省驛站一律裁撤文函統由郵遞

郵政

古浪郵寄代辦所自清光緒三十一年設立爾時驛猶未裁函件甚少每年約售郵票百數十元至二百元不等至民國三年驛站一律裁撤公私文函概由郵遞民國五年出售郵票二百九十五元六年出售郵票二百六十三元七年出售郵票三百一十七元從此票價漸加售票亦漸多信問交通亦云便矣後改縣城內代辦所爲三等郵局嗣於二十七年又在古浪創設三等郵局一處

電綫

古浪縣志
卷七
三
涼州城內東大街
河西印刷局承印

自中外交通以來凡遇交涉情事必須急速傳達郵傳所不能及者專賴電音以濟之而於軍事方面所關又爲重要古浪地當甘新大道境內原設電柱五百六十三根自烏稍嶺界牌起至雙搭堡界牌止綫長一百零五里近年又增設自大靖堡達涼州電綫一道電話亦隨之通達至長途電話附設於各郵政局內

巡警

清光緒三十三年由知縣招帶巡警兵四十名用教練一員統由縣籌給饗薪等費爲一縣之巡警總局各鄉設巡警分局由鄉紳編練民兵槍械自備不給薪饗至民國元年裁撤三年奉令暨章程舉辦警備隊以鎮道爲司令知事爲管帶外用隊長一員排長三員練步隊一百二十名分四路駐防隊長駐本城排長三員分駐土門龍溝大靖稽查盜賊保衛治安至六年改名警察隊知事兼警察長用警

佐一員警察所附設縣署警隊分駐土門大靖龍溝縣城四處後改警察所爲公安局旋廢近年又在縣府置警佐一員

保衛團

民國五年奉令暨保衛團條例由知事詹澤霖諭飭各壩舉辦保衛團每壩公舉團總一名保董一名甲長二三名不等編練民團保衛地方成立者大靖安遠黑松黃羊西山東山等處惟西山壩安遠壩辦理認真人馬槍械俱精壯整齊足保一方治安云二十年後陸軍輪流駐防團因停辦

防軍

由駐涼中央陸軍騎兵第五軍軍長派隊在縣城及縣屬之二三各區駐防鎮守

保甲

古浪縣志

卷七

四

涼州城內東大街
河西印刷局承印

全縣共編二十六保二百五十一甲

社訓部

於民國二十六年奉令設置在縣城內南街


義勇警察隊

於民國二十七年奉令組織成立一中隊三分隊每分隊警士四十名由縣長督飭切實訓練其官警均爲義務職但必要時由縣府酌給旅膳等費其工作以稽查匪類防止漢奸間諜活動爲職責

長城附圖一

人之在古浪者無論土著外來皆指長城而謂之曰秦始皇萬里長城殊不知歷代築長城者非始皇一人長城之在古浪界者又非秦時所築考史記蘇代傳燕王曰齊有長城鉅防足以爲塞竹書紀年梁惠成王二十年齊閔王築防以爲長城續漢志濟北國盧有長城

古浪縣長城圖



至東海泰山記泰山西有長城緣河經泰山一千餘里至琅邪臺入海此齊之長城也史記秦本紀魏築長城自鄭濱洛以北有上郡蘇秦傳說魏襄王曰西有長城之界竹書紀年惠成王十二年龍賈帥師築長城於邊此魏之長城也續漢志河南郡卷有長城經陽武到密此韓之長城也水經注盛宏之云葉東界有故城始犇縣東至瀨水達泚陽南北數百里號爲方城一謂之長城郡國志曰葉縣有長城曰方城此楚之長城也若趙世家成侯六年中山築長城又言肅侯十七年築長城則趙與中山亦有長城矣以此言之中國多有長城不但北邊也其在北邊者史記匈奴傳秦宣太后起兵伐殘義渠於是秦有隴西北地上郡築長城以拒胡此秦之長城也魏世家惠王十九年築長城塞固陽此魏之長城也匈奴傳又言趙武靈王北破林胡樓煩築長城自代並陰山下至高關爲塞而置雲中雁門代

古浪縣志

卷七

五

涼州城內東大街
河西印刷局承印

郡此趙之長城也燕將秦開襲破東胡東胡卻千餘里燕亦築長城自造陽至襄平置上谷漁陽右北平遼西遼東郡以拒胡此燕之長城也秦滅六國而始皇帝使蒙恬將十萬之衆北擊胡悉收河南地因河爲塞築四十四縣城臨河徙適戍以充之而通直道自九原至雲陽因邊山險塹谿谷可繕者治之起臨洮至遼東萬餘里又度河據陽山北假中此秦并天下之後所築之長城也自此以後則漢武帝元朔二年遣將軍衛青等擊匈奴取河西地築朔方復繕故秦時蒙恬所爲塞因河爲固魏明元帝泰常八年二月戊辰築長城於長川之南起自赤城西至五原延袤二千餘里以此考之則古浪自圓墩子起至烏稍嶺止之長城一道爲漢武帝時擊匈奴置河西四郡後所築者無疑至於由泗水堡起至土門堡及由鐔尖灘起經永豐堡土門堡至大靖堡又東至靖遠縣之長城則爲明萬歷二十七年

春二月總督李汶上松山善後事宜疏中有曰松山東西一帶延長四百餘里堪修長邊一道河東自永泰索橋至小松山雙墩分界共一百八十里河西自泗水土門至小松山雙墩分界共二百二十里考此則知泗水永豐土門大靖等處之長城爲明邊無疑

明總督李汶上松山善後事宜疏

松山旣空故疆已復其經理善後最爲吃緊而善後非築邊建堡設官屯兵其道無繇今會官踏看松山東西一帶延長四百餘里堪修長邊一道河東自永泰索橋至小松山雙墩分界共一百八十里河西自泗水土門至小松山雙墩分界共二百二十里在河東則蘆塘川應設參將一員兵馬二十名築城一座蘆溝口以西紅水河應設守備一員兵馬五十名築堡一座蘆塘設防守一員兵馬一百名築堡一座在河西則扒沙營應設參將一員兵馬二千名幫築舊城一

古浪縣志

卷七

六

涼州城內東大街
河西印刷局承印

座阿壩嶺應設守備一員兵馬五百名築堡一座裴家營土門兒各設防守一員兵馬各一百名築堡各一座屯戍協守相爲聲援照得國初驅番衆於三受降城外河套賀蘭尙且無虜松山故自甯區成化初虜據套雖或不無西訖然去住有時松山亦非甌脫惟隆萬間款市一通賓酋等盤窟其中莊浪遂成一綫而蘭靖莊涼無處無時不遭荼毒且僞造妖書紅旗傳播眞主起於草地以搖遠邇雖屢入屢挫窺犯猶昔幸今恢復急宜修守查涼之泗水至靖之索橋橫互不過四百里乃舊自永安歷皋蘭渡河逾莊浪以至涼州則一千五百里舍此四百里不守而欲守一千五百里之邊果孰難而孰易修此四百里之邊牆又何難而何阻勘得自鎮番至中衛烽堠相望迄今舊址猶存其修邊也雖皆主於築牆然遇沙鹵則挑壕遇崖絕則削塹取其足以遏奔軼斯已也

軍事彙記

清同治以前兵事無可考同治四年陝匪大股賊至大靖堡東二十里之裴家營踞爲老巢四處焚掠至十月本境民團萬餘人分兩路堵賊一路於十五日北至武威縣界之河東堡遇賊團衆潰敗傷人數千一路於十七日至大靖之花庄子遇賊團衆大潰被賊肆行趕殺尸骸遍野九千餘人生還者數人而已至十月賊由土靖焚掠至縣城附近彌山遍野所過焚掠殺害無餘由古煖越西山壩至黃羊川破陷邨堡殺人無算此後賊衆遍地焚掠殆盡五年撲城下搶掠關廂民商旋即颺去至十二年十月賊由古浪峽突出西山壩五更時撲城下已登城矣幸城中人知覺捨命擁殺賊墜城而死者甚夥適城外軍營以礮擊雲梯賊不能繼續登城而去城得未陷而後左文襄公大兵一到地方肅清善後招來施牛散種散亡之民漸次歸

古浪縣志

卷七

七

涼州城內東大街
河西印刷局承印

鄉安土樂業將數十年光緒二十一年河湟匪亂竄擾河西由永登之亂泉子大于溝圖進佔縣屬之大靖堡大靖營游擊率營兵並鄉團多人會合南冲寺活佛趙札提番兵數百出境追擊賊勢不支向東竄去縣城及各鄉堡戒備甚嚴以故雖受驚恐未遭賊害民國十七年涼州鎮守使馬廷勳變亂國民軍總指揮孫連仲率大隊來涼勦之兩軍相交古浪適當其衝然尙未在縣境內作戰不過供支繁重而已惟大靖堡城被匪攻陷死傷人民二三百南城門並城樓均被焚燬二十五年十月紅軍由一條山擾至大靖堡攻堡城數日幸城內守將騎五師步兵旅旅長祁明山守禦有方城得保全敵料靖城難圖乃率衆由橫梁山經黃羊川越東山頂猛撲縣城爾時縣城軍隊有限而敵衆愈來愈多卒因衆寡不敵城遂被陷敵數萬衆在縣城及附近各鄉蹂躪四五日後騎五師旅長韓起祿馬呈祥及青

海一百師指揮馬彪馬元海等率大軍數萬入縣南之張家河越湖灘崱高嶺由西山川進攻縣城與敵連戰兩日城乃克復以彈丸蕭條之古浪受此悍敵之破壞家戶搶掠一空房屋焚燒幾盡兵民敵衆死亡達二三千人亦千古未有之一戰禍矣

案趙札提本南冲寺活佛馬稿云爲達隆寺僧殊誤

明總督李汶上掃空松山恢復疆土疏

略言本年三月松酋阿赤兔等糾合套虜宰僧著力免海虜永邵卜等人犯欲行闖邊過海各官軍堵截迎敵直擣黑馬圈河扒沙等處通共擒斬首級七百一十四顆俘獲番虜黃金榜什等五百餘名七月阿赤兔等欲圖報復仍糾海虜復行出犯官兵堵擊槍箭射打死頭目卜打台吉等五名及散虜五十餘人各虜敗走退遁大小松山九月二十五六等日兩河五道官軍會集大小松山虜俱遠遁逃竄

古浪縣志

卷七

八

涼州城內東大街
河西印刷局承印

不及者棄戈降服總計五道共斬首級四顆擒活虜二名俘獲番虜八百八十名馬駝羸牛羊一千五百餘蘭川營參將閻逢時等率兵從鹽場堡出境搜至插機灘離邊七百餘里斬獲虜首五顆生擒達女一口再行窮搜並無虜迹大兵通回入境看得松山廣袤千有餘里寶酋竊據三十餘年扼吭於莊涼剝虜於蘭靖左款右犯朝市夕蹂幸我偵探明備伐彼狡謀三月幾覆其巢七月再禡其魄於是約兩河之衆大集七路之師分道出兵四面進剿窮廬如埽磧鹵一空伏莽之夷稽顙內附撤塘之虜俛首就擒乃復周歷山川窮蒐陵谷南連蘭靖東盡蘆塘北斥流沙西通泗水膏腴可耨要害可垣師不殫財而留屯自裕兵不血刃而版宇悉歸自是履畝而耕列戍而守莊涼屹爲中土甘固聯若比鄰內貽堂奧之安外絕門庭之患此兩河之福萬世之利也

古浪軍用地理說

葆臣

古浪縣城說

縣城據古浪峽口東西南三面環山北臨平原西通西山口古浪河自峽口南來繞城東而北去此地行軍攻守異勢我守敵攻當於峽內及西山口設備毋使敵人突如其來出我不意所最要者必於東南西三面山頂先據之以防敵人登高視下爲附背扼吭之患蓋三面山顛距城俱在一里之內臨頂附視城中一覽無餘倘敵人據山俯攻則城中人不可措手足矣是臨城三山卽孫子所謂彼得則利我得亦利之爭地也若以攻言則宜從北面平原而來尙易下手若自南來必先於峽內得尺進尺節節爲營尤必冒險突攻據三山之顛則勢如破竹矣或自峽內之太平溝西北繞至西山口以分敵勢則或可以撲城猛攻然此則下策矣究不如先據三山之爲要也若然則縣城者孫子所謂山峻谷深非人力所能作爲之險地也總之縣城之地利於守不利於攻而無如近日城垣頹敗生靈彫敝一旦有警城中人紛紛解體雖有可守之險夫其與誰爲守

古浪峽說

峽口至香林寺東之柵子溝計迂曲共有一十六里峽口曰教場臺寬約七十二丈餘至下石嘴一束寬僅二十七丈餘至上石嘴一束寬僅二十九丈餘至跌路崖又一束則寬只一十六丈三尺及至新官灘則寬又一百二十餘丈矣南望香林樹木叢翠北峙鐵櫃石壁嶙峋仰視則紺宇琳宮深山壯色附臨則清流怪石勝地宜人誠所謂水窮山盡疑無路柳暗花明又一邨也蓋峽中大勢則兩山爲峽大河中瀉大道傍河西依山根其不能並車之處若下石嘴上石嘴跌路崖皆鑿石成路左巖右河以視井陘道中之車不得方軌騎不

古浪縣志

卷七

九

涼州城內東大街
河西印刷局承印

能成列奚異哉以行軍論之我其爲守也固有一將當關萬夫難過之勢然敵人倘超至香鐵二山頂以俯擊我則有險難守矣我其爲攻也冒險深入則敵人設伏以躡我後或據兩山之頂以高擊下則進退無路矣然或能用間出奇如偷渡陰平故智則從兩頭相扼以梗進退之路則敵人不戰自潰矣總之行軍於古浪峽攻固不利守亦不利以其地出則不能成陣居則不可爲營卽孫子所謂我出不利彼出亦不利之支地也至於兩山夾河線路中通高壁深崖俯仰神悚非又孫子所謂前有高山後有大河進則不得退則有礙疾戰則存不疾戰則亡之死地乎論者謂用兵於此地其守也較易於其攻也以地險如是必先據守不可致於人如唐太宗據虎牢以待敵漢高祖據成皋以敝楚是也然亦視行軍者之善用地利與否以爲古浪峽宜於守也彼馬謖據街亭之高山非以其險地宜守乎何以

古浪縣志

卷七

十

涼州城內東大街
河西印刷局承印

竟喪師喪地以爲古浪峽不宜攻也彼韓信背井陘之大水誰不曰置之死地乎何以竟拔幟易幟故曰在行軍者之善用地利與否然亦有旁通側出者若柵子溝南通火燒岔河可由張家河口仍至大道金家大溝東南通油楂墩可由黃羊川口仍至大道太平溝西通西山川可由西山口以至大道由此觀之雖曰峽中夾河只通一線之路而自熟於地形者視之則仍四通八達也

黑松堡說

黑松堡據安遠與縣城之中心點爲古浪南路之根據地西通張家河可由分水嶺至西山川則分水嶺其西隘口也由萱蔴河通鷄冠石峽以至安遠堡則鷄冠石峽其西南隘口也由東山溝以至黃羊之廟兒溝則東山溝其東隘口也由岔路墩東通黃羊川北連古浪峽則岔路墩者又三衝之要也其地東西橫廣兩山相距一里或二

里不等南北縱長二十一里有奇除大河兩岸平坦外餘皆山嶺縱橫溝岔紛歧以之行軍攻與守亦難以一概論論其守則必以黑松堡爲根本地而東西各隘口又須設備以防戳脇之制敵由南來則以龍溝堡爲前茅以古浪峽爲後勁而東西隘口之守備者其兩翼也敵由北攻亦如之然則於黑松堡能守而弗失斯南北大道不虞梗塞是黑松堡者兵家所必爭非孫子所云我得則利彼得亦利之爭地乎若以攻論實難措手無已籌萬全之策則必以不戰屈人爲要術南據安遠則鷄冠峽與龍溝堡之敵不得南馳矣東據黃羊川北塞峽口則岔路墩之敵不敢妄動矣此以靜制動之法也倘冒險突進則南北兩路俱可往而難返非孫子所謂挂地乎至於西路三溝深林險阻沮澤難行以之進攻易墜設伏之計蓋萱蔴張家火燒三溝之河者又孫子圯地之謂也然此特紙上空談以地形預決攻守之策耳至於相機制宜要在行軍者之臨時度地以一心操運用之妙歟

龍溝堡說

龍溝堡之地四水會同羣山環拱古浪河自安遠來爲兩山所束近傍堡東而北逝其自東來會者東龍溝水也其自西來會者西龍溝水穿堡中木橋而入大河者也西龍溝爲深山峻谷溝崖錯出非可以往難以返之挂地乎東龍溝深處與番境接壤雖南可通安遠北可通黃羊川然深林險阻沮澤難行若論此地用兵之勢斷不可以容大將旗鼓惟設伏用奇可令人莫測出沒之迹蓋卽孫子所謂所由入者隘所從歸者迂寡可以擊衆之圍地也總之龍溝堡地勢尤以隔河對面之沙溝臺爲最險之地孫子曰險地宜先據守不可致於人以此地北可遠瞭黑松之敵南可遙控安遠之勢東可坐防東

古浪縣志

卷七

十一

涼州城內東大街
河西印刷局承印

龍溝之不虞西可直扼西龍溝之咽喉據守此險則四面有備是沙溝臺者尤龍溝堡之最險地亦最要地也守龍溝者豈可忽乎哉龍溝堡地兩山根相去四十二丈八尺餘

安遠堡說

安遠堡據山坡地總名曰芥菜坡其地較縣城高約六十餘丈荒寒冷落敗址頽垣雖大道所經車馬絡繹而淒涼愁慘景况奚啻極塞寒邊也番界之雷公山聳於西積雪之龍溝山峙於東以故地寒民寡邨落寥如除傍路而居之數十戶外其餘僅西之張家庄譚家庄北之油房臺庄數家而已地僻民稀時防不虞加以安遠營移駐龍溝堡愈形僻寂居其地者蓋夜不安寢云至論用兵於其地則番界之可可口其西南隘口也番界之岡腰鴛鴦池其西北隘口也守備之設所不待言而尤必以本堡爲最要地蓋岡腰爲通萱蔴河與西

古浪縣志

卷七

十二

涼州城內東大街
河西印刷局承印

山川之咽喉其爲隘地也無疑至於可可口昔爲海寇出沒之途今則夷情效順稍可從緩而安遠堡之所最注重者尤全恃烏稍嶺爲屏蔽蓋烏稍嶺設有重鎮不但安遠無虞卽縣治南路俱恃以無恐矣烏稍嶺說詳於本說

烏稍嶺說

烏稍嶺乃天山之尾橫亘東西其山跨古平兩境爲省西大道之扼要其地荒寒特甚盛夏見雲卽時雨雪五月披裘卽此處也蓋其常年苦寒六月飛霜者非烏稍嶺之自爲其寒也緣南近馬牙雪山西依雷公雪山兩山俱高逾數百丈山巔入冰雪界故常年積雪嚴寒甚烈以致附近之烏稍嶺爲兩山寒氣所侵亦荒寒如是以行軍論之非孫子所謂險地乎險地宜先據守不可致於人倘西路有警必於此地先設重兵以據要塞而復於東之岔口武勝北之龍溝古浪

峽等處分設守禦則省西大道呼吸可通文報不慮梗阻河西大局保障有資矣誠以烏稍嶺者平古兩界之咽喉要地也蓋以守論則孫子所謂我得則利之爭地者卽此地也此守之說也若以攻論如敵人據嶺以塞我咽喉恐往擊不利敵人或由安遠東繞龍溝以距我歸路或由岡腰繞張家河口以躡我後爲前後夾攻之勢則我軍可以往難以返矣軍勢至此卽蹈孫子之挂地也奚可哉必也以守爲攻以靜制動兩面相禦於古浪平番縣城設重兵以爲根據地復於東西各隘口嚴其防守毋使敵人四竄毋使我軍輕敵毋蹈冒險輕進之弊相機制宜節節進逼如此敵人雖據烏稍嶺之險而無隙可竄無戰可挑久之無所得食雖不戰而敵自戢矣此不戰屈人之法也然亦有出奇制勝以疾戰克險者彼李遡之雪夜入蔡州狄青之元宵奪崑崙非攻險也哉非攻險也哉而何疑於攻烏稍嶺

古浪縣志

卷七

十三

涼州城內東大街
河西印刷局承印

西山川說

西山川之堡距城三十里何以名川以其地兩山夾平原寬或五六里三二里不等長四十里自堡以東田皆引柳條河水以灌然源邇泉細全恃雨雪之水夏令雨少水涸澆灌不可爲常以故有水田名無其實也其地縣城適衝其川口堡西之哈西橫溝與番境毘皆要隘也若於此地用兵宜以縣城爲根本地與堡之爲守者互相應援尤須於西南之分水嶺西北之馮岷溝設備防守以消敵人從旁抄入之患蓋分水嶺南可通安遠之岡腰東可達黑松之張家河以至大道若不於此而設守備恐敵人從彼兩路而來路僻人稀聲息不得突然撲至不啻自天而下也若馮岷溝北通武威之沙溝西通張義堡山嶺起伏出沒難測所以不可不視爲要隘也總之西山川者兩山之間深谷處處卽孫子隘地之謂也至於分水嶺馮岷溝與堡

東之太平溝又非孫子謂所由入者隘所從歸者迂之圍地乎守勢如此攻勢可知亦視行軍者相地制宜臨時決機何如耳

土門堡說

土門堡在縣治東北距城六十里以弧度驗之在縣城北偏東四十九度舊圖在正東者誤也其地西通涼郡東南通大靖土質腴美水田沃饒夏令炎熱冬則稍寒與縣城氣候大異堡南八里許曰漪泉山漪泉出其下焉堡東門外木橋防山水之阻路橋兩頭市商繁盛熙來攘往者不絕其東北有臺柏樹叢生風景亦佳與漪泉木橋爲古浪八景之三曰柏臺春暮曰漪泉流飲曰河橋夜月皆風景之地也距堡東北十餘里曰黃花灘距堡南十餘里曰鵝頭山昔爲隘口以防套魯今則無虞矣若於此地用兵實可爲養精蓄銳之區蓋此地水草豐饒糧食充裕以之用兵當以本堡爲必爭之地若然則土門

古浪縣志

卷七

十四

涼州城內東大街
河西印刷局承印

堡者卽孫子所謂我得則利彼得亦利之爭地也乎

大靖堡說

大靖堡距縣城一百五十里路若弓形以弧度計之其堡在縣城正東稍偏北數度舊圖在東南者誤也其地南依雪山北近大漠其爲水田者特彈丸之地水自不毛山發源合小直酸茨條子諸溝水流出峽門分三渠灌田東曰長嶺壩東北曰大河壩西曰山泉壩堡南有泉曰湖灘泉分兩溝灌教場壩教場壩者附堡腴壤也堡西北三十里曰古山墩煤鑛有名百餘年不竭論其大勢則古浪之沃土其惟大靖乎若以行軍言則南峽爲大道所經倘西路有警宜於抬車嶺設重兵防守則峽門咽喉之地不虞梗塞而尤以本堡爲根據地則東可備裴家營之不虞西可通土門與縣城之聲氣其南與峽內抬車嶺之軍互相應援則大局可告無虞至若北邊之石峽子三道

鹽槽及土裏無膝明沙嘴等處昔爲防蒙之要隘今則更宜視爲邊防之屏蔽矣

古浪縣志

卷七

十五

涼州城內東大街
河西印刷局承印

